

Бичкдүдт килмджән өгхмн

Мана орн-нутгт бички күүкдин эрүл-мендинь харслгьнг ганхцн эк-эцкнь биш, мана государств болн Коммунистическ партъ килдж аргьинь хяаня. Кесг олн санаторийс, спортивн площадкс, детсад, детясль бичкдүдт гаргьгддж өггднә.

Школд ордг күүкдәс талдан, хамгин бичкдүд, гарад сар хонг болснаснь авн долан насн күртлнь хялэгьад, сургьад асрдг учрежденьс, детясль болн детсад гидж бәадг зөвтә. Гунтагьас авн долан насн күртлнь детсадт бичкдүдиг хяләнә. Детсадин чирнь элдв ик. Бички күүкд сәәхи цевр-цер орта-дертә, нег зүсн әдл хувцта, шишлнь сургьдж асрдг улста, эмчтә, нег цагла хотан уугьад, нег цагла унтад, нег цагла наадг чаньгь диг-дарата бәадг зөвтә. Тиигәд, детсадас школд ирсн күүкд дигтә, нәрн сургьмджта болна.

Мана Хальмг таньгьчар ода деерән 15 детсад кәдлджәнә. Тер детсадмудт 485 бички күүкд орна. Июль сарин нег шинәс авн Приозерн, Яшкульск, Юстинск болн Приютненск райодар 25 күүкд ордг детсадс шинәс секгдхмн. Элст балгьснд 100 күүкд ордг детсад шинәс немдж секгдхмн. Эн детсадмудин тонь мана таньгьчин әмтнә бичкдүдиг тетгдж багтадж чадшго. Яшалтинск, Каспийск болн Черноземельск райод детсадт күүкд орулх тоогьинь икдүлтхә гидж сурджана, Целинн район, шинәс дакад нег детсад секти гидж сурвр тәвджәнә.

Ода бәәсн детсадмудтнь даньгин тоогьаснь үлү бичкдүд ирәд зована. Үлгүрлхд, Каспийск районд 25 күүкдин ормд—35 ирнә, Элстд 100 күүкдин ормд 110 күүкд даньгин

ирцхәнә. Иим йовдлмуд детсадт кегдх сургьмджин болн цевр-цеерин кәдлмшт саалтг болад, дакад олн зүсн гемд кәтлвр болна.

Элстд болн наадк райодин детсадмудт зә уга болсн учрар кесг олн бички күүкд кәдлмш кедж чадх эрүл-дорул әкнрән орагьад, гертнь бәр-джәцхәнә.

Өдгә цагт райодар бәәх детсадмуд хуучн, му гермүдт бәәцхәнә. Дотрк хамг өлг-әднь болвчн, дер-девскрнь болвчн тату-тартг, газагьаснь яслгь бас кедго бәадж. Суулин джилмүдт эн тоот шинрүлдж әс күцәгддж.

Элст балгьсна детсад эврәннь бәәдләрн, кесн кәдлмшиннь дамшлтарн райодин детсадмудт үлгүр болх зөвтә бәәсн, болв эн детсадин бийднь дуту-дунднь дала. Детсад кесг джиләс нааран кәдлджәнә, тер бийнь бәәсн гернь сән болвчн, ясвр диг уга, күүкдин ор-дернь, өлг-әднь күртхш, суулин 3-4 джилмүдт немдж юм хулддж авгдсн уга, ода деерән 55 орндг, 20 столмуд, 60 кәнджлмүд күрчәхш. Ска-тертьс, шкафс гидг юмн нам уга. Детсадиннь эргнд модд тәргдсн уга, хаша уга, цецгс болн нань чигн олн зүсн юм тәрдг газр бас уга. Суудр чигн уга, бички күүкд газа агь-арт гарч наадг аргь уга, эднә бәәх ик чолун гернь оньдинд нарнд шатад, халун элснд халад зогсна.

Иим ик дуту-дунд бәәдлд балгьсна боли района күч-кәлсчирин депутатирин Советин күцәгч комитетс, сургьуль-әрдмин халхин отделмүд оньган өгч, ард үлддж йовх эн кәдлмшинь эрк биш өбдлүлгьн— бачм төрмүд.

А. СЕМЕНОВА.